

P O M A T A H I T I : MONIRE 31 NO TITEMA 1984.

---

TAIORAA : Luka 2/41 - 52.

FAAITOITO RAA : Luka 2/49 : Ia haapao vau i ta taù Metua e tia'i.

O teie noa te tahi mau parau rii tei faatia i te parau no te vai api roa raa no Iesu, tei haere e na metua no'na i Ierusalem no te oroà.

Ia au i ta tatou taio raa, te ite atu nei tatou e, na metua no'na, e tau taata mataro ia i te haere i te oroà i Ierusalem i te mau matahiti atoà oia hoi : e utuafare paieti teie.

Ua ite maitai te mau metua ati Iuda paieti i ta ratou hopoià i te haapiiraa i ta ratou mau tamarii i te parau no te ora raa faaroo, te parau no te Atua, no ta'na ture e tae noa'tu i te mau mea maere ta'na i rave no to'na here i to'na nunaa. O te ohipa mau hoi teie e au ia tatou ia rave, mai ta tatou i euphe i te taimetatu e pupu ai i ta tatou mau tamarii i te bapetizo raa : "E haapii anei oe i teie tamarii i te mau parau no te faaroo e vai i roto i te parau a te Atua ia nehenehe ia'na ia haamau i to'na faaroo i nia i to te Atua aroha tei haapapu hia mai na roto i to'na bapetizo raa. E pùpù anei oe ia'na i roto i te rima no te Ekalesia ia nehenehe atoà ia'na ia faaineine i taua tamarii ra no te ora raa cheresetiano : "E te pahono nei hoi tatou e, E. E au rà ra e, aita te mau mea i tupu mai i tano roa i nia i ta tatou pahono raa, e aore rà aita te mea i parau hia i rave hia.

Ua parau aè<sup>nei</sup>/tatou e, e mea haapii te mau metua faaroo ati Iuda i ta ratou mau tamarii i te parau no te mau mea maere ta te Atua i rave no Iseraela ; e ia au atoà ihoà i ta te Atua i parau ia ratou e : "Ia riro taua mau mea rà ei manao raa na outou e na ta outou mau tamarii i tera ui e i tera ui e amuri noa'tu.

A hio na tatou i te parau no tera tamahine-iti Iseraela i o Naamana o tei fa'i i to'na faaroo i te Atua i te naô raa e ahiri taù fatu e tae i te taata o te Atua rà e ora oia. Te ite o tera tamahine no te mea ia e mea haapii hia oia i te parau no te Atua e i to'na mana i te faaora raa ia Iseraela ; e teie to'na tiaturi raa, mai te mea e, ua tia i te Atua i te faaora ia Iseraela, eaha ia e ore e tià toa'i ia'na ia faaora i to'na Fatu ia Naamana.

Mai te reira'toa i roto i teie utuafare no Nazareta, te faaite hia ra i te irava 47 no teie pene parau e : 'Maere anaè ihora te feia'toa i faaroo ia'na i to'na ite e i ta'na parau'. E ere anei no te mea ua haapii hia oia i roto i te utuafare e i roto hoi i te mau sunago. I roto i te faanaho raa a te Ati-Iuda e ia au hoi i te ture : (Exodo 23/17 ; 34/23 ; Deuteronomi 16/16) : E mea titau hia te mau ati Iseraela'toa ia haere i Ierusalema i te mau matahiti atoà no te haapao e no te faahana-hana i na oroà rarahi e toru :

- 1°) Te Pasa ; te oroà no te faatiana raa.
- 2°) Te Penetekose : te oroà no te auhune e no te horoà raa hia mai no te ture i Sinai.
- 3°) Te Patia raa tiahapa ; te oroà haamano raa i to Iseraela pu-hapa haere raa i roto i te medebara e to te Atua parahi tamau raa mai i rotopu i to'na nunaa.

No te mau tamarii api, ua farii hia ratou i te amui atu i taua mau oroà rà i te 12 o te matahiti, i reira ratou e tuuhia'i i raro a'è i te faanaho raa no te ture mai te feia paari atoà te huru ; e i te reira'toà taima ratou e mairi hia'i e te tamaiti no te ture, e aore rà te tamaiti no te faufaa, no te fafau raa parau.

Iesu i te 12 raa o to'na matahiti o tei riro i teie nei ei tamaiti no te faufaa, no te fafau raa-parau.

Eita e ore e, e oaoa rahi to'na i to'na amui matamua raa i teie oroà Pasa, mai ta'na'toà i hinaaro i te amui e ta'na mau pipi i te oroà Pasa hopeà hou tona pohe satauro.

Te amui nei oia i te mau faanaho raa tumu no te faaroo a to'na nunaa.

Eita e ore e, i to ratou haere raa mai na Nazareta mai i Ierusalema, ua himene atoà oia e te mau ratere perelina i te mau Salamo no te paiumaraa (mai te Salamo 121, 122, 134).

- E hio anei taù mata i te mau aivi no ô ia Iehova rà te tauturu iaù.
- Oaoa aè rà vau e te feia'toà i parau mai iaù e, tatou i nià i te fare o Iehova.
- E haamaitai ia Iehova e te mau tavini atoà no'na rà. E hopoi i to outou mau rima i nià i te vahi moà rà a haamaitai ai i te ioà o Iehova.

E 7 mahana te maoro raa no taua mau oroà rà.

Na Nazareta te haere tià i Ierusalema e ere ìa i te mea fatata ; na te reira e faaite mai i te anaanatae o taua mau taata rà i tera mau oroà ; noa'tu te atea e noa'tu te maoro e tae ihoà ratou. No tatou noa'tu te fatata e ere i te mea tae ohie noa, e noa'tu e 2 hora e aore ra 1 hora e mea maoro roa ìa ; eaha'tu pai ìa e 7 mahana aita ìa e haapao raa faahou no tatou, eita ìa te oroà e hope ua hoī tatou i te fare ua fiu.

Areà no ratou ; e anaanatae raa ìa e e oaoa raa hoi i te haamanaô-raa i te aroha rahi o te Atua tei faatiama ia Iseraela e to ratou hoi anaanatae i te hio raa e i te feruriraa i te parau a te Atua e i ta'na haapao raa i horoà mai no ratou.

Iesu i Ierusalema, ua haere ìa i te haapii raa, e aita'toà tatou i papu e, eaha rà te faito no to'na i te taua taime rà, e mea i te rà ; no te mea ua faatupu te reira i te maere raa i roto i te mau orometua. E au rà e, i teie nei â, te faaite rà oia i te mea ta'na e parau i muri aè i te naô raa e, "E haamaitai au ia oe e taù Metua, i te mea e, i huna ê noa na oe i teie nei parau i te feia paari e te ite ra, ua faaite mai rà oe i te mau tamarii nei".

Ta tatou parau no teie pô : te parau ìa no te ora raa faaroo e to'na faufaa. Te anaanatae raa i te amui i te mau oroà no te haamanao raa i te aroha o te Atua. E mea maitai atoa ia tatou e, eaha te auraa no te mau ohipa e no te mau oroà no te faaroo e to te Atua hinaaro ia tatou i tonono mai ai oia i ta'na Tamaiti. A ora tatou i roto i te mea ta tatou i euphe.

Te parau a te Atua o te vahi ropu ìa no ta tatou taio raa no teie pô, e ei vahi ropu atoà to'na i roto i to tatou ora raa.

I to Iesu haere raa i te hiero i rotopu i te mau orometua i te faaroo raa'tu e i te uiui raa'tu hoi ia ratou : "E nehenehe ia parau e ; te parau a te Atua te hinaaro o te Atua o to'na ìa manaono raa tumu" o ta'na ìa haapapu i to'na na metua tei imi ia'na (te parau a te Atua te mau ohipa a te Atua o te mea faufaa roa è ìa no'na). Eaha rà hoi ta tatou mea faufaa roa è ?

I te hepetoma i mahemo, ua faahanahana tatou i te oroa no Noela, te vai noa ra anei te faufaa ta taua oroà ra i faaite mai e i afai mai i roto i to tatou manao e aore rà ua oti ihoa te reira parau i te mahana Noela ra.

Te tia nei tatou i teie pô hopeà no teie matahiti e te fatata roa nei tatou i te matahiti api, e patu hia nei oia i nia i te parau a te Atua te parau ta Iesu i faariro ei mea faufaa rahi.

Te parau ra Paulo i to Kolosa 3/16 : "Ia vai te parau a te Fatu i rotopu ia outou e i roto roa ia outou".

Te parau a te Atua o te tama i te mau vahi arehurehu no to tatou ora raa, o te haamaramarama i to tatou e'a ; e o te faaitoito ia tatou e o te turai ia tatou i mua i roto i te faaroo raa i te Fatu e i te ite raa i to'na hinaaro e i to'na aroha.

Ia vai mai taua parau a te Fatu rà i rotopu ia tatou e ia vai ora noa oia i roto i to tatou manao e i ta tatou ohipa.

"A imi outou na mua i te Basileia o te Atua e te parau tià na'na e amui hia mai te mau mea'toà ia outou o ta Iesu ia i parau mai.

AMENE.

M A T A H I T I    A P I    1 9 8 5 :

---

Taioraa Pipiria : Salamo 62  
Iatopo 1/22 - 25.

Faaitoitōraa : Ohipa 10/33 (v. r.)

"E teie nei, teie ana'e matou tei mua i te aro  
o te Atua ..."

E hoa here ma e,

Ua oti iho nei te matahiti tahito, te haamata nei te hoê matahiti api, e teie tatou i mua i teie nei matahiti, tei te mahana matamua tatou no teie matahiti. No reira, o oe, o vau, o tatou, "teie ana'e ĩa i mua i te aro o te Atua". Hohoa mau, mai te hoe aroraa, e aore ra, hohoa no te hoê tere. E 2 ohipa e itehia nei :

- Te vai nei tei mahiti mai (tei ora mai)
- Te vai nei tei mairi (tei pohe)

E oia mau, te vai nei tei farerei i te mau ati i te roaraa no te matahiti i mairi aè, te vaira tei manuia, te vaira tei ore i manuia, te vai nei tei roohia i te mau ma'i, e tei fatata roa i te pohe, e ua mahiti mai, oia hoi, tei ora mai. Te vai nei te tahi pae tei tamatahia, tei faahemahia. Te vai nei tei farerei i te oaoa. E te reira mau mea, o te mau ohipa e vai nei i roto i to tatou oraraa.

Teie ra, te vai nei tei mairi, na roto i te pohe, e aore ra, te tahi melo herehia no to'na utuafare tei faarue mai. No reira, "teie oia i mua i te aro o te Atua", eiaha i roto i to'na taatoàraa, e ua afa oia, no te mea, ua here oia i taua melo ra i moe, ua taamuhia oia i nia i taua ohipa ra i moe.

"E teie nei, teie ana'e matou tei mua i te aro o te Atua".

Te Atua, e metua ia, tei titau i ta'na mau tamarīi, ua hinaaro oia i te haaputuputu i ta'na mau tamarīi. Teie ra te ite nei, te vai nei tei amui mai, te vai atoa nei tei mairi.

Ua mairi paha, no te mea, ua tapeahia te tino i te ma'i, e aore ra te hoê ohipa tei tupu i roto i i to'na oraraa.

E i te pae o te Metua, te peapea'toa ra oia i te mea ua mairi te hoê o ta'na mau tamarīi.



Ia hio anaè tatou i te Fatu, i roto i to'na oraraa i te ao nei, ua imi oia i te mau ravea'toa no te tiaï, no te paruru i teie pupu iti na'na, oia hoi ta'na mau pipi. Ua ite tatou e mea pinepine to Iesu parahi raa i rotopu ia ratou, e mea varavara to Iesu faarueraa ia ratou anaè, tapao faaite ia tatou i te hinaaro mau te Fatu i te tiaï ia ratou. Ua hinaaro atoa oia e faaite mai i te hoêraa e vaira i rotopu ia'na e ta'na mau pipi. hohoa mau, mai te hoê tiaï mamoe, tei ara i nia iho i ta'na nânâ. E i te taime e vaiho mai ai oia i ta'na nânâ, ta'na mau pipi, e riro taua taime mai te hoê ohipa tei tapaohia i roto i te oraraa o te Fatu, e taua ohipa ra, o te pure ïa, ua pure Iesu no ta'na mau pipi, mai tei faaitehia i roto i te Evanelia a Ioane 17. Ua pure oia i ta'na Metua ia tiaï, ia paruru ratou, ia vai hoê noa ratou i mua i te aro o te Atua.

To te Atua hinaaro, o te tiaï ia i ta'na mau tamarii eiaha ratou ia ino, ua hinaaro oia i te haputupu i ta'na mau tamarii mai tei parauhia "Ua haaputu ra oia mai te mai'a moa e haaputu i to'na mau fanaua i raro ae i ta'na pererau".

"E teie nei, teie ana'è matou tei mua i te aro o te Atua".

Mai te mea e tei mua tatou i te aro o te Atua, e tapao faaite atoa ia tatou e, te hinaaro nei te Atua e parau mai ia tatou, e parau ta te Atua ia tatou i teie omuaraa no teie matahiti api.

Te hinaaro nei oia na mua roa i te faaite mai ia tatou, e ia vai hoê noa tatou, ia haere amui tatou te tahi e te tahi. Te hinaaro atoa nei oia i te faaitoito mai ia tatou, oia hoi, ia vai pinepine tatou i mua i ta'na aro, no te faaroo ia parau mai oia ia tatou.

Te hinaaro atoa nei te Atua, i te faaara ia tatou, e i te omuaraa e taè noa'tu i te roaraa o teie matahiti, ia parahi noa tatou i pihaiho ia'na, no te mea aita tatou i ite i te ohipa o te tupu mai i teie matahiti.

Mai te mea, e hoa here ma, e faaea tamau tatou i mua i te aro o te Atua, e tiaturi tatou e, teie matahiti api ta'na e horoa faahou nei no tatou, e riro ïa mai te hoê haamaitairaa, mai te hoê ô, ta te Atua e horoa nei no tatou, no ta'na mau tamarii, e e nehenehe ia tatou ia haere amui ma te haapeapea ore, no te mea "teï mua tatou i to'na aro, e teï pihaiho oia ia tatou i te roaraa o teie matahiti. AMENE.



# VEA OROMETUA

Episetole papaihia ei faaitoitoraa  
e ei taamura a i te mau tavini o te Atua  
tonohia e te Ekalesia

N° 28  
1 9 8 7

PAOFAI, i te 28 no Atopa 1987.

17) / ā te mau taeae orometua,

Ia ora na i te here o to tatou Fatu.

E hoa here mā e, terā mai te hoē mau hohoā aōraa faaineinehia mai e te tahi mau taeae orometua e e tuahine ia au i ta ratou hioraa ei tautururaa ia outou i roto i te ohipa haapiiraa e faaitoitoraa i to tatou nunaa e i ta tatou mau paroita i "te matahiti etaretia" e i te matahiti tivira ta tatou e fatata atu nei i te tomo. Oia mau, mai te peu e, te haamata nei te matahiti tivira i te mahana matamua no Tenuare, no te Etaretia, te haamata nei ia "ta'na matahiti api" i te tapati matamua no te "tiairaa i te haereā mai o te Fatu" : i te tapati 29 ia no Novema no tatou i teie matahiti. No reira, mauruuru i teie mau tino tei faaineine mai i teie mau aōraa e a faaitoito maite ā tatou i teie nei ohipa haapiiraa i roto i ta tatou mau paroita (inaha hoi no te taata tatou i faatoroāhiā) ia ore to tatou mau taata paroita ia hahi i roto i ta ratou faaiterā e ia pee haere noa i te mau faahemāraa rau no teie mahana a te mau amaa faaroo ē ē e tere tamau nei na roto i to ratou mau utuafare.

Oia mau, i te mau mahana i mairi aē nei, ua ite outou i te parau no te faaiterā tei haafifi i te faaroo no te nunaa no te motu no Faaite e te mau ohipa peapeā atoa e tupu nei ā i teie mahana i roto i to tatou fenua na roto i te faearaa ohipa ... e tei faahaamano i te Etaretia i ta'na hopoiā no te faaiterā i te ora e vai ra i roto anaē i te Metia ra ia Ietu o tei haapii mai ia tatou e, na roto i te tauāraa-parau anaē e noaa'i te hoē mea maitai no te taatoaraa e, e tupu atoa'i te hau, teie rā ia rahi te faaoromairaa i roto i taua ravea ra e te farooraa e te faaturaaraa i te rauraa no te huru e no te manao o te taata mai te Fatu i na reira i niā ia tatou.

No reira, ia haamano tatou i te nunaa e i te hui-mano atoa o te fenua i roto i ta tatou mau pure, e ia faahaamano tamau noā te Fatu ia tatou, i te Etaretia, i ta tatou tuhaa e au ia rave ia au i to tatou tiāraa "tiāi-mata-ara" no te nunaa e no to tatou mau taata paroita.

No reira, e te mau taeae orometua a faataa i to tatou taime no taua ohipa haapiiraa i te vahi i matauhia e outou (fare pure, fare putu-puturāa, fare Ui-Api e te vai noa'tura ...) e a rave atoa i taua ohipa ra i roto roa i te mau utuafare !



"E rohi â tatou i te rohiraa o te faaroo", ia au i te parau a te apotetoro ra o Pauro, i te pae hopeâ no teie matahiti 1987 e hope nei e i te matahiti apî 1988 o ta tatou e fatata'tu nei i te tqmo.

Mauruuru ia outou, i ta outou mau Apooraa Tiatono e i ta outou mau paroita i te haapao-maite-raa i te mau ohipa atoâ a te APOORAA RAHI AMUI o ta te Fatu i horoâ mai ei haapaoraa na tatou i roto i ta'na Etaretia ... Ia horoâ tamau oia ia tatou i te tauturu o to'na Varua ia riro mau tatou i roto i te parau no te hoêraa ei mau "tiaï haapao maitai i nia i te nana a te Atua, o ta'na i hoo i to'na ihora toto".


Ia horoa atoa mai te maramarama no Noera ia tatou i to tatou iteraa i te aroha o te Atua tei hinaaro ia ora te mau taata atoa e i te puai i roto i ta tatou faaiteraa i te matahiti api e tomohia'tu nei e tatou.

A farii atoa mai i te poroi aroha o te Apooraa Faatere ia outou e i to outou mau utuafare i teie Noera e te Matahiti Api.

Ia haamaitai mai te Atua ia outou e i ta outou mau paroita.

I te ioâ o te Apooraa Faatere,

Te Peretiteni,

  
Jacques THORAI orometua



- TAPATI MATAMUA NO TE TIAIRAA -

TAPTI 29/11/87

-:-:-:-

TAIORAA : ITAIA 63/16-19.

FAAITOITORAA : ITAIA 63/16. y.h.

" O OE E IEHOVA, O TO MATOU IA METUA, O TO MATOU IA ORA ".

E hōa here mā, i teie tapati matamua no te tiairaa hou a ò atu ai tatou i roto i te mau taime no te faahaamano raa i te horoà a te Atua i to teie nei ao : Oroà no te oaoa raa no to te ao atoa i te horoà rahi a te Atua i te nunaa'toa.

Te oroà no te hau e no te peapea atoa hoi no te tahi pae tei ore i faarii. Teie mā nei o Itaia perofeta e tuu nei ia tatou i mua i teie parau faufaa e te manaono rahi.

Parau faufaa i te mea hoi e, te faahio nei Itaia perofeta i te parau no ta tatou fairaa faaroo i te mau mahana tataitahi e aore ra i te mahana tapati.

Parau faufaa ei faaferuri faahouraa i te taata tataitahi i te mau pure atoa ta'na e tuu nei i mua i te aro o te Atua mā te parau e " E TO MATOU METUA ".

Parau faufaa ia faarii te nunaa teretiano i te mau ino atoa ta'na i ora mā na a 2000 matahiti i teie nei.

A ui ana ra tatou e, i roto i to tatou oraraa taatoa, ua faarii noa anei tatou e, e ua riro te Atua o Iehova ei metua mau no tatou ?

E riro paha i te tahi mahana, oia hoi i te mau taime ati, te mau taime peapea te mau taime ahoaho. E parau mā, e riro atoa tatou i te parau e, e taata tatou e ere hoi tatou i te Atua i te moàraa i te mau mahana atoa.

Ta tatou ohipa e ite nei, māori ra ia tupu te tahi mau ati rarahi ua piri roa' tu ia tatou i te Atua ra na roto i ta tatou mau faahaehaaraa. I te mau taime oaoa ra, ua moehia ia te Atua ra o Iehova.

Inaha hoi e iau i te aratairaa a te'evaneria, te Atua, e ere ia i te Atua no te hoē noa taime, e Atua ra no te mau taime atoa, no te mau hora atoa, o oia tei hinaaro ia ora te taatatoa, eiaha ra ia riro ei tīti aore ia, ia pohe.

No reira te parau raa e " O OE E IEHOVA TO MATOU METUA ".

Te tatarahapa raa ia i te mau hinaaro o te Atua tei ore i faaohipa papu hia i roto i to tatou mau utuafare, i te mau vahi tei reira tatou, e hau atu i te reira i roto i ta tatou mau paroita, ta tatou mau amuiraa, tera e tera tomite ohipa.

Te reo no Itaia perofeta, ua riro atoa ia ei parau manaonao rahi no tatou e te hui faaroo.

Manaonao i te feruriraa e, e faarii anei tatou i teie reo " O OE E IEHOVA O TO MATOU IA METUA, E TO MATOU ORA ".

I mua i teie reo no Itaia perofeta, aita anei tatou iho i faairiro ia tatou ei metua hau ae i te Atua te metua no te mau taata atoa. Iho mai nei te fifi, fanau mai nei te peapea, te amahamaha, te fifi e te taparahi taata, eiaha noa e na roto i te rave raa i te tahi mau moihaa tama'i, na roto atoa ra i to tatou huru e ta tatou mau tuuraa reo.

O oe anae ra e te hui faaroo o te tia ia feruri e ia pahono i teie mau manao. I mua i teie reo no Itaia perofeta oia te faa'iraa e, " O IEHOVA TE METUA E TO TATOU ORA ".

Te faahio faahou nei ia, ia tatou e ta tatou faanahoraa i to tatou mau utuafare to tatou huru i nia i ta tatou mau tamarii, e mai te mea ra hoi e, aita te tamarii e ite faahou nei i te tiaraa o to ratou mau metua. Oia atoa te orometua e ta'na paroita, te apooraa tiatono e ta'na amuiraa e te vai noa tura.

Te aratairaa e te haapiiraa i te tamarii aita ia e fifi, area ra, i roto i taua mau aratairaa, te uiui atoa ra ia te manao e.

E na roto noa anei i te faaheporaa a riro atu ai ei oaoaraa na te tamarii ia apee mai i te eā e hinaarohia.

E na roto noa nei i te paruru noa raa i te tamarii e aore ia i te vaiiho noa raa ia ratou ia rave i te mau ohipa'toa ta ratou e hinaaro, a riro mai ai ei taata paari, ei taata tei ite i te feruri.

E na roto noa anei i te tuu noa raa i te tamarii i te mau aroraa'toa, te mau faahemaraa toa no te mau mahana tataitahi, e riro ai oia ei taata paari.

Teie mai nei o Itaia perofeta e tiaoro nei i te tiaraa o te metua no te mau nu-naa'toa.

Ia faaetaeta te Atua, no te aha oia i haavi ai ? No te aha oia i faautua'i ?  
Ia ite oia i te fifi, no te aha oia i vaiiho noa ai i to tatou tiamaraa ia haere noa na ?

Ia horoa oia i te hoē reni ohipa, no te aha aita oia i horoa'toa i te tahi reni e atu ?

Ia tuu oia ia tatou ia haere i mua, no te aha oia i vaiiho noa ai ia tatou ia hahi ē na ?

Ia paruru oia, no te aha oia i faatamarii noa ai ia tatou ?

Ia tiaturi oia ia tatou, no te aha aita e faaheporaa ?

E hoa here ma, teie mau uiuiraa o te hoê ïa no te mau ohipa moê ta te Atua to tatou metua i rave, e eita hoi te hoê e tia ia vavahi, ei faatahoê ra ia tatou i roto i te fatu.

No reira i roto i te tau no te tiairaa, eaha te manaonaoraa e tupu mai, maori ra to tatou faahoi faahou raa i to tatou tiaturi raa, to tatou farerei faahou i to tatou metua e to tatou ora.

AMENE.



- FAAITOITORAA NO TE PITI O TE TAPATI -  
 NO TE HAEREA MAI  
 -:-:-

TAIORAA. PIPIRIA : Itaia 40 / 1 - 11.

E homa e,

O te piti teie o te tapati no te haerea mai o te Metia i te ao nei. Ua riro teie area taime, hou oia a tae mai ai, eiaha no te mea, aita â oia i tae mai, ia riro ra ei faahamanaoraa i te hui faaroo i te aroha hau ê no te Atua i te ao nei. E teie taime no te tiairaa, ua riro ia ei taime i reira te hui faaroo e faaineine ai ia'na i reira te utuafare tatai tahi, te taata tatai tahi e faaineine ai ia'na no te haerea hanahana o te Fatu i roto i teie nei ao, e teie te irava parau tei hamanaohia mai no tatou : "E faaamu oia i ta'na nânâ mai te tiaï mamoe ra ..." Itaia 40/11 (v.m).

I mua i teie nei parau, tei riro mai te hoê parau titauroa i te nunaa, ta te peropheta e pii nei (irava 9 - 11), ia paiuma i nia i te mou'a, no te faaroo i te hoê parau api, no ô mai i te Atua ra. Ua titauhia te nunaa, ua titauhia te mau oïre atoa no Iuta, ia amui i te vahi hoê, i reira ratou e hio ai i te huru no to ratou Atua, te Atua rahi, te Atua puai hope, te Atua mana-hope. Te hinaaro nei to ratou Atua i te paraparau ia ratou, no nia anei i to ratou huru, to ratou ino, to ratou taiva, i roto anei i to ratou titiraa. I roto i ta tatou parau no teie mahana "E faaamu oia i ta'na nânâ mai te tiaï mamoe ra ..." O vai ta te peropheta e faaau nei i te tiaï mamoe ? No'na hoi anei teie parau ? E nehenehe e parau na mua roa, e tano ihoa teie parau no te perofeta iho, inaha taaê noa'tu ai te auroa no to'na tiaraa peropheta, teie hoi te auroa : "vaha no te Atua, auvaha parau na te Atua". Ua riro atoa te peropheta ei tiaï i te nunaa a te Atua, ei mata ara i nia i te nunaa. Teie ra, aita te perofeta e hio nei teie parau no'na iho, te hio atea nei, te perofeta, oia hoi, te tohu atea nei te perofeta i te parau no te tiaï rahi, te tiaï mamoe maitai, oia hoi te Metia (Ioane 10).

"E faaamu oia i ta'na nânâ mai te tiaï mamoe ra ..."

E mata na tatou i te hio i te huru no te hoê tiaï mamoe : Na to'na manao, to'na huru, to'na hinaaro, e na to'na vai tauraara i roto i te nânâ, na te reira mau tapao e faaite mai te hoêraa no te tiaï e tae noa'tu i te mau mamoe.

Te tahi atoà tapao no te faaite raa ia tatou i te hoêraa no te tiaï e te mau mamoe, na roto ia i te faaoromairaa e te hereraa no te tiaï i ta'na mau mamoe, na te reira'toa e ite hia'i te ora-amui-maitai-raa, e te reira e turaï ia i roto i te tupu maitai raa no te nânâ.

Aita te mau mamoe i ite i te tumu ratou i maiti hia'i, e taè noa'tu i to ratou huru. E mea pouri roa te reira i mua i to ratou mata, area no te tiaï ra, o te riro ei manao tumu no'na, o te maitai ia no te mau mamoe, Noa'tu te huru o te mamoe, noa'tu i te tahi taime te parahi nei te mamoe i roto i te maitai, noa'tu to ratou huru ino, noa'tu i te tahi taime, aita te mamoe e faaroo nei i te tiaï, e aore ra aita i ite i te ohipa ta'na e rave ra, inaha, te vai taamu noa nei ratou i to ratou tiaï, no te mea, ua ite ratou i te faaroo i te reo o to ratou tiaï, ua ite ratou i te faaroo i te taahiraa avae o to ratou tiaï, i te mau ohipa e ravehia e te tiaï, ua mataro maitai ratou i te reira, e ua hinaaro ratou ia vai tamau te tiaï i rotopu ia ratou.

I teie mahana, o te piti ia o te tapati no te tau no te tiaïraa i te haerea mai o te Fatu i te ao nei, e na roto i teie reo o te perofeta ia tatou, te faahaamano faahou mai nei ia tatou, e te tiaï mau nei tatou i te Tiaï nui, to tatou tiaï mau.

Te Tiaï, na mua roa, te faataa nei oia ia'na no te nânâ, oia hoi no te nunaa. E mea manaonao na'na te nânâ. Ia ore te tiaï, e vai noa ia te nânâ e aore ra aita faahou e nânâ. Te tiaï anaè te ite i te vahi ta'na e arataï i te nânâ, eita te tiaï e arataï te nânâ i roto i te vahi maa-ore, i roto i te metepara, te reira huru tiaï, e tiaï aitarahuhia ia. Te tiaï anaè tei ite i te oraraa no te nânâ no amuri atu. Na te tiaï e atuatu i ta'na nânâ, ta'na mau mamoe tataï tahi i te mau mahana'toa. Na'na e rapaau, na'na e horo'a i te maa i te taime e poia, na'na e faainu i te pape i te taime e poiha'i te mamoe. E ara oia i nia i te nânâ i te pō e te ao. E paruru oia i ta'na nânâ eiaha ia roohia i te ati, eiaha ia o mai tē eiā haru i roto i te aua. E ohipa rahi mau ta te tiaï, e e mea fifi atoà te taata i te farii i te tiāraa tiaï. Mai te mea, tei roto tatou i te taime no te tiaïraa i te taēraa no te tamaiti a te Atua, te Tiaï Nui, tei horoa i to'na iho ora no te mau mamoe, o oia anaè tei rave papu i teie tiāraa e taè roa'tu i te pohe. O tatou atoā tei fai e ia riro tatou ei tiaï no te nânâ a te Atua, e ani tatou i te Atua ia tauturu ia tatou i roto i to tatou tiāraa tiaï no te aua mamoe a te Atua. Ua ite tatou i to tatou mau vahi paruparu, eiaha ra ia riro to tatou paruparu ei haafifi raa i te ohipa a te Atua, ia tuu ra tatou e ia haamauuru i te Fatu oia i riro ei Tiaï Nui no tatou. Oia i maiti ia tatou i roto i ta'na auā, i roto i ta'na

nānā, oia i faariro ia tatou ei mamoe na'na, e oia'toa tei maiti ia tatou ei tiai no ta'na nānā.

Oia mau, o Ietu to tatou Tiai Rahi, no reira o oia anaē, tei ite i te vahi ta'na e hinaaro i te aratai ia tatou, o oia anaē tei ite i te mea<sup>ta</sup>/tatou e hinaaro, o oia anaē tei ite i te maa ta tatou e amu. Na'na anaē e iriti i te uputa e aratai ia tatou i roto e i rapaē i te auā, e na'na anaē e horoa mai te hau (repos) no tatou, no te mea o oia to tatou ora e te maramarama no te nānā . A haamaitai tatou i te Fatu, oia i maiti ia tatou i roto i ta'na aua, e tei riro ei Tiai nui no tatou

AMENE.



- FAAITOITORAA NO TE TORU O TE TAPATI -  
 NO TE HAEREA MAI  
 -:-:-:-

TAIORAA : IOANE 1 : 6-8 ; 19-28

IRAVA : 23 ... : "o te reo vau o te hoê e pii haere i te metepara e, E faatitiaifaro i te e'a o te Fatu ..."

- Ua tae tatou i te toru o te tapati no te tiairaa ia NOERA, e te faa-hamano faahou nei te taioaraa ia tatou i teie mahana na roto i te huru o IOANE PAPETITO, i te ohipa i titauhia ia tatou e te huru no te ohiparaa e tia ia tatou ia rave i roto i teie tau no te tiairaa ia NOERA.

I te mau matahiti atoa, ua riro o NOERA ia au te hi'oraa a te taata, mai te hoê noa mahana, oia hoi te mahana no te 25 no Titema. Hou teie taio mahana no te 25 no Titema e i muri mai hoi, eita te parau no Noera e hiti faahou mai. Ua vaiho noa hia oia, e ua ta-otia hia oia i te hoê mahana papu maitai, oia hoi i te 25 no Titema.

Taaê noa'tu te reira, ua rau atoa te huru no te tiairaa ia Noera e itehia nei i roto i te tiaturiraa o te taata ia au ihoà te oraraa e ora hia nei i teie tau i roto i te totaiete. E mahana oaoa rahi o Noera, e mahana tei faataahia i reira e tupu roa' i te mau opuaraa, te mau faaineineraa rau, te mau oroà etc... I reira atoa vetahi pae e farij ai te mau ô e te mau poroi e rave rahi. E mahana atoa teie i reira vetahi pae e hi'ohio ai te hotu no te mau raveà o tei faaohipahia i roto i te mau faa-tianianiraa. E mahana i reira vetahi pae e numera ai te rahiraa o te mau aau tei ô i roto i te ô pape no ta ratou faanahoraa, ia nehenehe te reira ia haamaitahia e ia u'ana roa'tu i te mau matahiti i muri. Ia hi'ohia te parahiraa o Noera i roto i te huru o te oraraa o teie tau i roto i to tatou totaiete, ua haamauhia te reira i nia i te hoê noa taio mahana oia hoi te 25 no Titema. Ua riro roa o Noera mai te hoê mahana, tei haafaufaa te peu, e aore ra tei haafaufaa te taoà e tei faa-ona i te taata. Ua fatu hia te reira hūru faanahoraa i nia noa te tahuà no te oraraa o te taata (ligne horizontale) e o tei haapaari maitai hia ia ore te hoê taata ia mahere. I mua i teie huru oraraa no teie tau, i mua hoi te huru no te tiairaa ia Noera e ora hia ra e tatou i teie mahana, e mea tia ia tatou ia hi'ohio faahou i te huru no te tiairaa mau ta te Atua iho i titau ia tatou na roto ia IOANE PAPETITO. Ia ore tatou ia haamau noa te tiairaa ia Noera i nia noa te umeumeraa e faanahohia nei e te taata. Ia riro râ te reira tiairaa, mai te hoê

ohipa tei omuahia e te Atua, tei omuahia hia mai nia mai i te ra'i e o tei faahahohia eiaha no te mahana 25 no titema noa, eiaha atoa no te taoà, eiaha atoa no te faa-ôna raa vetahi pae, ua faanahohia râ teie tiairaa no "Te hoê taata"; oia hoi o Ietu Metia. Ia haapapu tatou i teie tau i to tatou tiaraa faaroo, to tatou tiaraa ite no Ietu Metia i mua i te mau raveà atoa e faanahohia nei e te taata o tei haafaufaa nei te peu e te taoà, inaha hoi, o NOERA ta tatou e tia i nei e aore ra e "taata" ta tatou e tia i nei oia hoi o Ietu-Metia.

I roto i teie tau no te tiairaa, e rave rahi atoa mau reo i roto i teie totaiete anoi o te uiui atoa nei i te hui faaroo e : "O vai oe ?" O vai oe i roto i teie nei ao ? O vai oe i roto i teie Totaiete Maohi ? O vai oe i roto i te faanahoraa o te Totaiete ? E reo teie tei faaroo hia a 2000 matahiti i teie nei, mai roto mai i te mau tahuà e te mau Revi tei tonohia mai e te mau Ati-Iuta no te uiui ia IOANE-Papetito e : "O vai oe ?" I mua i teie mau tia Ati-Iuta, ua hinaaro o IOANE i te haapapu e, ua maitihia oia e te Atua, ei reo tei pii i te metepara, tei pii i te hoê vahî tei reira te fifi o te tia ia faatitiaifarohia no te haerea mai o Noera.

E mea tia atoa i te hui faaroo i teie ihoà râ tau, i te haapapu i to'na tiaraa, ei reo pii. Ia faateitei te hui faaroo i to'na reo pii i roto i to'na totaiete, ia tupu te hoê tauiraa, ia tupu te hoê faa-titiaifaroraa hou o Noera a tae mai ai. Ia faateitei te hui faaroo i to'na reo pii, ia tupu te hoê fariuraraa, ia tupu te hoê tatarahaparaa, ia tupu te hoê faoreraa hara i rotopu te nunaa, i rotopu i te mau hui mana, ia ineine e ia titiaifarò te aau o te taata no te te haere raa mai o Noera. Te tiairaa ia Noera, o te hoê ĩa taime ohiparaa, hoê taime faaineineraa, hoê taime tata'iraa i te mau hapa, hoê taime no te haapaeraa ia'na iho, hoê taime no te faaho'i faahouraa te parau-tia ore i nia i te parau-tia, hoê taime no te tata'iraa te mau ohipa tia-ore i roto i te ohipa tia. Te tiairaa ia Noera, o te hoê ĩa taime i reira te hui faaroo e hi'ohi'o faahou ai te vairaa no to'na tiaraa, ei reo tei pii no te faatitiaifaroraa te mau mea atoa no te haerea mai o te Fatu. Te tiairaa ia Noera, o te hoê atoa taime, o te tia ia ora... roa hia i roto i te hau o Noera. Hoê hau tei ore i tuati i te hau ta teie nei ao e horoà mai. Hoê hau tei tia ia tatou tatai tahi ia hamata, ia ora i teie nei ā taime ... E ia riro tatou ei ite no taua hau ra, e ei reo tei pii i te haereā mai no taua hau ra i teie nei ā, ananahi, e a tau ā hiti noa'tu. ...

AORAA TAPATI 20 NO TITEMA 1987 : TIAIRAA MAHA.

TAIORAA : RUTA EV. 1. 26 - 38

IRAVA : RUTA EV. 1. 37.

"AORE ROA HOI E MEA E ORE TE TIA I TE ATUA".

E hoa here ma, i teie tapati te ô nei tatou i roto i te tuhaa hopea no te tau o te tiairaa.

No teie tapati ua hiohia mai teie nei irava parau na tatou no te faaitoito raa ia tatou i te tiairaa i te parau rahi no te fanauraa o te ora o teie nei a'o. Na roto i teie pene parau ta tatou e hi'o nei i teie mahana, e rave rahi te mau tapa'o e aore ia te mau temeio tei faaite mai ia tatou i te huru no to te Atua hinaaro rahi e faaora i te taata. Oia mau ia tuatapapa maitai tatou i teie parau e roaa mai ia tatou te tahi mau tapa'o no to te Atua ohipa raa i rotopu i te taata ia ora oia e ia ô oia i roto i te faanahoraa oraraa a te Atua. Te tapa'o matamua o to te Atua ia parauraa. E hoa here mā, e ere/te mea rahi te taime to te Atua parauraa i te taata. Ua ite tatou e i roto i te faufaa Tahito, e rave rahi taime ua parau nā oia i te mau perofeta, e te tahi atu mau tavini to'na ta'na i faaue e faaara i to'na nunaa ia Iteraera i te tahi mau parau. I ô nei ua na rotō oia i te hoē merahi i te parauraa. E ua haere mai oia i roto i te hoē vahi, te hoē oire iti o Natareta. E i taua tau ra e ere hoi teie oire i te mea ite hia e te taata.

Ua ite tatou e hoa here mā e i te mau taime atoa e parau ai te Atua, no te faaite ihoa ia i te tahi mau parau faufaa roa. E i ô nei o te parau ia no te fanau raa o te hoē faaora no te a'o nei. No reira atoa paha o Maria i mata'u ai i te taime a fā mai ai te merahi i mua ia'na. I roto i teie aparau raa te matara mai nei te aroha mau o te Atua, te here no te Atua, ma te haapapu maitai ia'na "Eiaha e mata'u" na mua roa.

Te piti no te tapa'o, te fafau nei te Atua ia Maria. Te faaara nei oia ia'na i te fanauraa o Ietu, teie io'a e horo'a oia no ta'na tamaiti. Te auraa no teie nei io'a, te faaora, te faatiama, e e horo'a hia no te aiu a teie vahine. Eita oia e horo'a hia ei io'a a'e no te hoē merahi, no te hoē varua, no te hoē haapa'o raa, maoti ra e horo'a hia no te aiū a teie vahine oia te Tamaiti na te Atua, e roaa to'na patireia e a muri noa'tu. Oia te parau api oaoa tei fafauhia no tatou, tei hinaaro hia e tatou. O te hoē tamaiti no ô mai i te Atua ra no te haere mai i rotopu ia tatou, i roto i to tatou oraraa, ia riro oia ei arii, ei tavini, ei taeae e ei ho'a no tei paruparu, te feia māi, te te feia veve e tei faainohia e te taata.



Te toru o te tapa'o, o to te Atua ia ohipa raa oia mau aita oia i parau noa, aita oia i fafau noa, e ohipa atoa ra oia ia tupu taua mau ohipa atoa ra. I mua i te mau uiuiraa a Maria te haapapu nei te merahi i te huru no te ohiparaa te Atua ia tupu mau ā ta'na i opua.

Noa'tu e aita i papu maitai te tupuraa no teie fanauraa no Ietu ia au mai ta tatou e taio ra i roto i teie pene parau. Te vahi ra ta tatou e hio maoti ra o te hoho'a ia tā teie nei vahine e faaite nei oia hoi o to tatou ĩa huru to te taata. O tei hinaaro noa ia maramarama noa te mau mea atoa, eita tatou e tiaturi nei i te mau ohipa tei parauhia ia tatou mai te peu e aita i tatara maitaihia ia tatou te huru no te tapuraa. Te auraa ia no te uiraa a Maria : "Eaha ĩa e tia'i" ?

E hoa here mā, i teie tapati, hou a'e te oroā Noera. Teie te pahonora tei tuu hia mai i mua ia tatou no ta tatou mau uiuiraa atoa. "Aore roa hoi e mea e ore e tia i te Atua!"

E tia ia tatou ia haamana'o maite i teie parau hou a'e tatou a haere atu ai i mua i te parau no te Noera. Eita e ore ua ô mai te tahi mau mana'o i roto ia tatou i teie tau i mua i te mau fifi atoa ta tatou e ite nei i ô tatou nei e i roto i teie nei a'o. E eita e ore te parau atoa tatou i te tahi mau taime e e aore roa e rave'a faahou ta tatou, e ta te Atua atoa.

Te faaite mai nei teie parau ta tatou i teie mahana e, ua riro mau ā o Noera ei tapa'o no te Here no te Atua i te taata nei, e ta'na i faaite atea roa ia tatou i teie ā tapati.

No reira, na roto i to'na parau raa ia Maria te parau atoa mai nei oia ia tatou i ta'na parau api oaoa, e te faaite atoa mai nei ia tatou i te huru o te ohipa ta'na e nehenehe e faatupu ma te haapapu maitai e : "Aore roa hoi e mea e ore te tia i te Atua".

Ia haamaitai mai te Atua ia outou i teie oro'a no te fanauraa o te ora no teie nei A'o.

Iaorana i te Fatu.

- A O R A A    N O    T E    N O E R A    -

Mahana pae 25 no Titema 1987

-:-:-:-

TAIORAA : Tenete 18 / 1 - 15  
 Ioane 1 / 9 - 14  
 Apotarupo 21 / 6.

Mai te fanauraa o Itaata e tae mai i to Ietu, te mau parau i fafauhia i roto i te parau tuatapapa o te Atua e te taata ua itea ĩa na roto mai i te hoē mau tamarii mai ia Itaata, ia Tamatona, ia Tamuera, i te aiū i tohuhia e te perofetaara e Itaia 7/13-16 i te anotau no te arii ra o Ahata e o Ietu iho, tei hopoi mai i te ao nei e ora ra i roto i te ati e i te peā-peā i te hoē hiaairaa no te fanauraa, no te faaapī-faahou-raa, no te tiātu-riraa.

Mai te hoē aho apī i te anotau no te ruhiruhiaraa, no te peapea poritita e aore ĩa no te hoē ao haavīhia e te riri e te pohe, te faaite nei taua mau fanauraa ra i te hoē faaapī-faahou-raa i te oraraa ta te huru tauiore o te Atua e nehenehe e faatupu. Teie rā ia farii-atoa-hia taua mau fanauraa ra e tiā'i !

Ia fariihia taua mau tamarii rii ra, ia faaamūhia, ia paruruhia, ia haapiihia e tae noa'tu i te mahana e nehenehe ai ia ratou na roto i ta ratou ohipa ia faaite i te hoē tiaturiraa ora. Eita te mau tapao no te hinaaro faaora o te Atua e tupu ohie nā roto noa i te hoē fanauraa, noa'tu e fanauraa aroha noa e te haehaa ; ei tuhaa papū atoa'e rā e te tuutuu-ore ta te taata (tane e te vahine) ei reira taua opuaraa faaora na te Atua e tupu mau ai ; ua ite tatou i te ohipa rahi e te teimaha a te hoē utuafare i roto i te parau no te fanauraa o te hoē tamarii rii !

Te faaite mau ra iho ā rā te pipiria i te parau no te mau tamarii tei fariihia e tei ore atoa i fariihia ; e ere rā i te mea rave ohie ia tau i te mau peu i matarohia ia tae mai te hoē aiū fanau apī i roto i te oraraa utuafare ; e tau i oīa i te huru no te oraraa utuafare i haamauhia na roto i te rohirohi ; e faahuru ē o ĩa i te mau peu i rave-noa-hia mai na e o tei tiaturihia hoi e e mea maitai ; oia mau, ua mataū o Tara e ata ihora, ua tau i te vahine a Manoa, te metua tane o Tamatona, i te huru no ta'na amuraa i te maa, ua ite te metua vahine o Tamuera i te huru o to'na oraraa i te tau-raa-hia mai ta Maria atoa i ite i to'na i te tau-atoa-raa-hia, e ua patoi hoi o Ahata i te parau no te Emanuera i tohuhia.

Te ioà o Ietu, e faaora te Atua, e aore ĩa o Emanuera, te Atua i ò tatou nei, e faatupu ĩa o ĩa i te anotau iho o Ietu : i te manao oaoa, i te tiaturi-ore rahi o te taata ia'na e taparahi roa'tu ai ratou ia'na. No reira, te parau fafau o ĩa'nae, eita ĩa e ravai : ia apiti-atoa-hia râ te parau fafau e te parau no te fariiraa ...

No reira, i te taime e faahanahana-faahou ai tatou i te fanauraa o te Metia, e mea maitai ia tatou ia ite i te ohipa ta'na e faatupu i roto ia tatou. Eita anei te fanauraa o te Metia e faatupu i roto ia tatou i te manao feaa i tupu na i roto ia Aperahama, te tiaturi-ore o Tara tei ata, te patoiraa-taparahi-taata o Herota e te haapao-ore o te paeau rahi o te taata tei ore i ara i te tupuraa no te fanauraa o te Metia? E nehenehe atoã râ taua parau ra e ore e faataui i te huru no te hoê oraraa i matarohia e tatou maori râ i te tahi noa paha manao mauruuru i te hoê oroã fanauraa i matarô-noa-hia e tatou e ta tatou iho mau tamarii ...

Eita râ to tatou huru e faahuru-ê-raa i te parau mau no te aroha o te Atua i heheuhia mai na roto ia Ietu-Metia, e i ta'na atoa opuaraa faaora i te taata. Teie râ e mea faufaa roa te mau mea atoa ta tatou e rave no te tupuraa o te parau fafau a te Atua. Noa'tu te tiaturi-ore o Aperahama raua o Tara, eita te fanauraa o Itaata e tupu ahiri e aita e tuatiraa manao i itea i rotopu ia raua ... oia atoã ahiri aita o Maria e o Iotefa i farii i roto i to raua manao turori, eita Ietu e riro mai ei taata ... eita atoa tatou e faufaahia mai te peu e eita tatou e faaohipa i te parau api oaoa a te Atua. Eita te ata no te faaoraraa a Tara, te himene haamaitairaa a Maria e riro ei mea faufaa no tatou ia ore tatou, mai ia raua e te feia atoa i apiti atu ia raua, ia farii i te parau fafau no te ora i horoãhia mai e te Atua e i te mau faaapĩraa ta te reira e titau mai ia tatou.

Ia haaferuri râ te faaiteraa no te fanauraa o te Metia i to tatou faaroo e ia hau roa'tu to'na puai i te puai ta te fanauraa o Itaata i faatupu i roto ia Aperahama, e auraa ĩa to te Noera no tatou i reira, te ora ra ĩa e te ohipa ra ĩa te Emanuera i roto ia tatou na roto i to'na Varua, e mau tamarii mau ĩa tatou no te parau fafau, tei amui i roto i te ata a Tara e i te himene a Maria, noa'tu to tatou mau manao feaa e te tapitapi !

Noa'tu to tatou huru, te horoã mai nei te Atua ia tatou i te ora na'na, te haapao nei te arefa e te ometa ia tatou no te aratai ia tatou mai te fanauraa i roto i te fanau-faahou-raa e tae atu ai tatou i te puna vai ora.

I te mau matahiti atoa te manao tumu maori râ ia itea-faahou-hia ĩa teie nei parau ora i roto i te mau Etaretia, ia faaamu e ia haapapŭ o ĩa i te faaroo

No reira e ere i te mea ohie ia farii i te parau fafau a te Atua !  
 Ua tano mau ĩa te parau a Ioane no te Metia : "I haere mai o ĩa i o'na ihora,  
 e aore to'na ihora taata i ite atu ia'na". (Ioane 1/11).

Ua mataro noa tatou i te tuatapapa i te mau parau no te fanauraa ia au  
 i te faaiteraa a Mataio e a Ruta, aita'tura tatou i ite maitai faahou i te au-  
 raa no taua mau parau ra, i manao ai au no teie Oroà Noera, e ani ia tatou ia  
 tuatapapa i te huru o Aperahama raua o Tara i mua i te parau no te fanauraa o  
 Itaata. No te mea eita e ore e to tatou huru e to Aperahama raua o Tara hoē ā  
 ĩa i mua i te parau no Noera ...

Noa'tu to'na haapao-tamau-raa i te mau parau fafau a te Atua, ua ruhi-  
 ruhia o Aperahama e aita hoi ana e tamarii i tae mai ai ia'na e toru tau ratere  
 pererina i te hora e mea puai i te mahana. O Aperahama o tei ite i te fifi no  
 te oraraa i te metepara, ua rave ĩa i te mau mea atoa e au no te farii maitai-  
 raa i te mau manihini : ua faaineine o ĩa i te tahi maa vahi iti pape no te  
 tāma e no te faainu i te mau manihini, maa vahi iti faraoa e te inai no te faa-  
 itoitioraa i te mau manihini. E ere rā ĩa te reira i te ohipa apī inaha hoi i  
 taua anotau ra e peu matarohia iho ā te reira e te taata e ora ra i roto i te  
 metepara i te farii i te taata, tei ite e eita e ore o ĩa i te fifi e i te hi-  
 naaro atoa i te tauturu a te tahi i te hoē mahana.

Te ohipa maere i tupu i taua mahana ra, o to te hoē ĩa o na ratere  
 pererina uiraa ia Aperahama e tei hea roa o Tara e faaite atura e e aiū ta'na  
 e noaa ... Taua parau fafau ra tei tiari-maoro-hia e o tei ore i tiaturi-faahou-  
 hia, ua haavāvā ĩa ia Aperahama e ata atoa ihora o Tara i to'na tiaturi-ore i  
 taua parau ra ; ua ruhiruhia hoi o ĩa e ta'na tane, e eita hoi o ĩa e fanau faa-  
 hou i te tama areā o Aperahama ua "paruparu" ĩa ! I roto i te tiaturiraa papū  
 o Tara, eita ta raua tamarii e noaa faahou, e ua hautihia e ua faaohia raua  
 e taua ratere pererina ra.

Ua ite rā te ratere pererina i taua taime ra i te manao-feaa i huna-noa-  
 hia e Tara i roto ia'na, e faatupu atu ra o ĩa i te faaroo i roto ia Aperahama  
 (Eaha, te vai ra anei te hoē temeio te ore e tupu i te Atua ?) ma te haapapū ā  
 i te fanauraa o Itaata tei fatata roa.

E mataū rahi to Tara i te faarooraa i taua parau rahi maere ra tei na  
 roto mai i taua ratere pererina ra. Ua ite rā taua ratere pererina ra i te ma-  
 nao tiaturi-ore o Tara. Hoē matahiti i muri aē, ua fanauhia mai taua aiū ra e  
 ei haamanaoraa i te oaoa e i te mau manao tiaturi-ore o to'na metua vahine o  
 Tara, ua mairihia te ioā o taua tamaiti iti ra ia Itaata. Teie hoi to'na auraa :  
 "i ata o ĩa".



e i te parau no te taviniraa a te mau taata faaroo, ia tinai o ĩa i te tiaturire e i te mataũ e ia faatupu i te arueraa e i te haamoriraa i roto i te au taata. E i teie ā matahiti, te haere mai nei ā te Atua ia tatou nei na roto ia Ietu-Metia ia nehenehe ia tatou ma te tauturu a te Varua-Moà ia faahanahana ia' na i roto i teie nei ao e tae noa'tu i te mahana e farii mai ai o ĩa ia tatou i roto i to'na Patireia.

Ia haamaitahia te Atua i niā i te rai teitei, e ei hau i nia i te fenua nei i te mau taata atoa, tei herehia e ana ! Ua fanau mai te hoē tama na tatou, ua horoāhia mai te hoē tamaiti na tatou.

Na tatou e farii, e atuātu e e tauturu i te tupuraa o teie nei oraraa i pūpūhia mai ia tatou no te hanahana o te Atua e ei oaoaraa no tatou. AMENE.

(na Frédéric VERNET orometua no Petera teie nei aoraa).

## T A P A T I 27 NO TITEMA 1987 :

### RUTA EVANERIA 2/22 - 40.

Ia ora na e te hui faaroo, a faatae atu te aroha i to outou pae. I roto i ta tatou taioaraa, te parau faufaa te hio hia mai e te manao, o teie na farereiraa i rotopu i te utuafare o Ietu e teie na taata paari. Te taata matamua o Simeona to na ioa, e taata parau tia e te haapao maitai. E taata teie, i roto i te tiairaa i te Faaora o te mau nunaa atoa. Teie reira ta na manaonaoraa i roto i to na oraraa, ua vai noa tera manao i roto ia na oia hoi ia ite ia Ietu hou a pohe atu ai. Te vai tamarii noa ra o Ietu, ua faatura teie taata paari ia na. Ua ite atoa teie taata paari e o Ietu teie te tamaiti a te Atua. Te papu ra ia tatou i te rahi o te oaoa o teie taata. Te ohipa o ta na i tia i noa na, te ite ra oia i teie nei. Ia haamaitai hia te Atua no te reira. A hio na tatou i te mau parau a teie taata paari i parau no Ietu :

- te ora no te mau taata atoa (ir. 30-31)
- e tiarama no te mau etene e no Iteraera (ir. 32)

Te farereiraa i rotopu ia Ana e te utuafare o Ietu, e mea taaê rii. Aita e parau ta Ana i parau na Ietu. Te vahi noa ta te papai evaneria Ruta e faaitera e peropheta oia, e vahine tei haere pinepine i te hiero, e tei tamau i te pure e te haapae raa maa i te rui e te ao.

Teie na farereiraa, ua tupu ia i roto i te hiero no Ierutarema. Ua haere o na metua i Ierutarema no te pupu ia Ietu i mua i te aro o te Atua. E tupu teie ohipa i roto i te hiero. O te tumu ia, i farerei ai ratou i roto i te hiero. Ua tano te haereraa o te utuafare o Ietu i te hiero e teie na taata paari. Ia haamaitai hia te Atua tei faatupu i teie na farereiraa. E teie tau taata paari tei parahi noa i roto i te tiairaa e ia ite i te Faaora o teie nei ao hou to raua poheraa. Ua faufaa to raua tiairaa, ua ite raua ia Ietu.

No teie na farereiraa, o Ruta evaneria noa tei faatia i te reira. Ua maiti oia i te hiero o Ierutarema, ei pû no teie na farereiraa. I roto i te oraraa o Ietu, ua riro te hiero no Ierutarema ei vahi e haere pinepine hia e Ietu. Aita te hiero o Ierutarema i riro noa ei vahi maitai no Ietu. I roto i ta tatou taioaraa, ua riro oia ei vahi farereiraa i te Atua to na Metua ei vahi farereiraa i teie na taata paari. Ua riro atoa teie na taata ei mau ite matamua no Ietu. Na te mau parau a Simeona i parau no Ietu e haapapu mai ia tatou i te rahi e te hohonu o te faaroo o teie taata. E pure haamauururaa na na i te Atua, tei farii e haamaoro to na pue mahana no te ite ia Ietu. Simeona e o Ana e hohoa

te reira no te mau taata tei faaoromai i roto i te taviniāraa, tei horoa papu ia raua no te maitai o te ohipa a te Fatu. Aita raua i ite i te mau ohipa ta Ietu i rave oia hoi ta na mau ohipa faaora mai e ta na mau haapii raa. I te reira vahi, ua tuati ia tatou. Ua mauruuru noa raua i te iteraa ia Ietu tamarii. Te haapii mai ra teie taiōraa i te faufaa e vai ra i roto i te farereiraa te feia paari i te tamarii. Mai te tamarii e hīaaī ra i te feia paari oia atoa te feia paari i te tamarii. Ia tuati maitai raua e tia ai. E tia atoa ia tatou ia parau, e ua ora o Simeona e o Ana i to raua faaroo i te ite noa raa ia Ietu tamarii. E ora atoa tatou i to tatou faaroo. Ia tauturu mai te Atua ia tatou.

Ia ora na.

Tehaapapa orometua

P O M A T A H I T I : 31/12/1987.

---

ISAIA 55 / 1 - 5 :

- E te feia atoa i hiaai ra e, teie te pape  
A haere noa mai  
E o oe, aita e hiaai ra, e ere ĩa no oe teie titauroa
- E te feia moni ore, teie te maa  
A haere noa mai - Mea horoa noa -  
E o oe atoa, e te taata ona, e te taata moni,  
A haere noa mai !  
Aita e faufaa no ta oe moni no te mea, aita e hoo raa, mea horo'a noa  
Te hiaai ra oe ? a haere mai  
Te poia ra oe ? teie te maa  
A haere noa mai
- Eaha hoi outou i horoa'i i te moni i te maa ore ?  
E ta outou ohipa i te mea paià ore ?  
E faaroo mai na, e ora ĩa to outou varua ...  
"O te inu i tena na, e poiĥa faahou ā ĩa.  
I te inu rā i te pape e horo'a hia'tu e au nei,  
e ore roa ĩa e poiĥa faahou ... (Ioane 4/13)"  
"E ore hoi te taata e ora i te maa ana'e ra, i te mau mea atoa rā,  
i haapaohia e te Atua'ā ... (Ioane 4/4)"
- E te feia atoa i hiaai ra e : te feia moni ore, te feia ona !  
Te feia atoa e ohipa ra i te mea paia ore  
O outou atoa o tei hiaai ra, A haere mai !  
A haere mai, a faafariu mai i to outou tari'a  
A faaroo mai na, e ora ĩa to outou varua ...  
A haapa'o maitai mai na ia'u  
E mauruuru ĩa outou i te maa maitatai roa ra :  
E hoa here ma, teie ta tatou pene-parau faaitoitoraa tei faataa'hia  
no teie pō hopea matahiti 1987. Ua maramarama tatou, e te tumu parau no  
teie taioaraa, o te parau ĩa no te maa.  
Te parau no te maa, aita e faufaa e tuatapapa i te mea, ua ite maitai  
tatou i te rahiraa, te aano, te roaraa no teie parau no te maa.  
I te tahi taime, ua ite atoa tatou i to'na teiaha !  
E faufaa rahi rā, te maa, no to tatou oraraa. Aita ana'e e pape, aita e maa,  
e paruparu te tino, e aita e oraraa faahou, oia hoi, e pohe ĩa te hopea.



Na roto rà i tè taioraa i teie pene-parau, ua papu maitai ĩa tatou,  
e teie maa e faahiti hia nei e Isaia, o te Parau ĩa a te Atua o ta tatou e  
tutava noa nei, e hiaai nei, e poià noa nei ...

Mai tei faahiti hia e te peropheta ra o Amosa (8/11)

"Inaha te na ô maira te Fatu ra o Iehova, te fatata maira te tau e hopoi  
atu ai au i te o'e i nia i te fenua, e ere rà i te o'e maa ore,  
e te hiaai i te pape, i te faaroo rà i te parau a Iehova ..."

Ia hi'o mai tatou i te tere raa no teie matahiti, ua pohe â nei tatou  
i te poiã, e aore rà i te poiã ?

E tia paha ia pahono e, e aita tatou i farerei mai i te reira fifi.

Ua ite rà tatou, e na roto à nei i te afata teata, e aore ra, na roto i te mau  
ve'a, e ua ù te tahi mau fenua i te reira ati rahi. Aita roa rà tatou.

Teie ra, aita anei rà tatou e ô ra i roto i teie tau o'e ta te peropheta ra  
o Amosa e faahiti nei ... e ere i te o'e maa ore, e te hiaai i te pape,  
i te faaroo rà i te parau a te Atua ... ?

No te mea, ia ĩ tatou i te Parau a te Atua, e ite mata hia i roto i to  
tatou oraraa no te mau mahana'toa, i roto i te oraraa vaa mateinaa. (totaiete),  
te mau hotu ta te Parau a te Atua e faafanau mai, oia hoi, te tauaraa  
i te tahi, te Aroha, te here, taa ē noa'tu ai te horo'a raa, te opereraa  
i te maa e te pape, e te aroraa hoi, ia fana'o te taatoa i te mau maitai  
atoa no te oraraa, ia au hoi i ta te Atua horo'a i to te āo.

Ia ĩ tatou i te Parau a te Atua, e ite mata hia te mau hotu i roto i to  
tatou oraraa ...

... i poia na hoi au, e ua horoa mai outou i te maa na'u

i poiã na vau, e ua faainu mai outou ia'u

e taata ē au io outou, e ua ite mai outou ia'u

i veve na vau, e ua faaahú mai outou ia'u

i pohe na vau i te ma'i e ua utuutu mai outou ia'u

i roto vau i te tapearaa, e ua haere mai outou ia'u ... (Mataio 25/35).

O outou i na reira i te hoē taeae iti haihai roa i roto i tau mau taeae  
nei, ua na reira mai ĩa outou ia'u."

E hoa here ma, e parau mau teie :

Ia ĩ tatou i te Parau a te Atua, e ite mata hia teie mau hotu e faahiti  
hia nei e Mataio.

E parau mau atoa rà, e ia atea tatou i te Parau Ora, e tupu te mau ino  
e rave rahi, e ite mata atoa hia : te au-ore, te feii, te aroha ore, te nounou,  
te taparahi taata, mai ta tatou i farerei iho nei i roto i to tatou iho nunaa.

Oia mau, ia ere tatou i te pape, ia ere i te maa, e paruparu te tino, e ore te ora, e e pohe hoi ! Oia'toa to tatou huru ia ere i te Parau ora ! E pohe rahi to tatou, ia atea tatou i te Parau a te Atua.

Teie rā, eita roa te Atua e hinaaro i te pohe - oi parau ai oia'ia Ezekielā i te pene 23 irava 11 :

... "te ora nei au ra, aore roa o'u e maruururaa i te pohe o te taata ino, ia fariu mairā te taata i ta'na parau ino ia ora : e fariu mai outou, e fariu mai ...

E te reo atoa o Petero i roto i ta'na epitetore II i te pene 3 irava 9.

... "e faaoromai rā to te Fatu ia tatou, aita roa i hinaaro e ia pohe atu te hoê, ia noaa paatoa rā te tatarahapa".

E hoa here ma, o tatou teie e faaroo amui nei i te parau a te Atua.

Mai te taata moni ore e tae atu i tei ona, o oe o tei poihi i te pape no o mai ia'na ra, o tei hiaai i te maa no ta'na parau ora e ere anei o teie te taime tei faataahia e te Aroha no te Atua ia inu, ia amu, e ia ora ?

Teie ta te Atua parau : "Ua faaroo vau ia oe i te anotau au ra, e ua turu atu vau ia oe i te mahana faaora raa ra : e inaha teie taua anotau ra, e inaha teie taua mahana faaoraraa ra ... II Kor. 6/2.

IA ORANA e te Matahiti 88, anotau au no te faaoraraa.

Matahiti no te faaroo raa i te Parau a te Atua. Ia ORA NA.

## MATAHITI API : MAHANA PAE I NO TENUARE 1988.

TAIORAA : Mataio 6 / 25 - 34.

"Eiaha e tapitapi i to outou ora, i ta outou e amu, e ta outou e inu, e te ahu no to outou tino ..." (Mataio 6/25).

O te poroi aroha ïa na Ietu ia tatou i te omuaraa no teie Matahiti Api 1988 : "Eiaha e tapitapi !" E au teie nei parau i roto i ta tatou taioraa mai te hoê faahoiraa himene i roto i te himene, tei mataro-atoã-hia e tatou i te parau e, e "oaoaraa" : "Eiaha e tapitapi !" E mau poroiraa atoa ta tatou i to tatou iho mau taata i herehia e-tatou i te omuaraa no teie matahiti apï, ia riro teie nei matahiti ei matahiti hau atu i te maitai e te oaoa no ratou i te pae no te tupuraa o te tino, no te oraraa utuafare, no te ohipa, no te ohipa, no te taviniraa ... E ua tano iho â tatou ia na reira no te huru iho. â o te mau ohipa e tupu noa nei i teie mahana i ô tatou nei (fifi no te ohipa-ore, faaearaa ohipa tuutuu-ore, e te vai noa'tura ...) .

Te parau nei râ te Fatu ia tatou i te omuaraa no teie matahiti api : "Eiaha e tapitapi !" E te mea e itehia nei e tatou maori râ te tapitapi nei tatou. Te tapitapi nei te taata no te mau mea e rave rahi. Te tapitapi nei tatou, te manaonao nei, te peãpeã nei e te uiui nei i te parau no ananahi, i te ohipa e tupu mai i te mau mahana i muri nei, eaha râ te ohipa e tupu mai arauaë, eaha râ te huru o teie matahiti no tatou, no te utuafare, no te fenua, no te nunaa, no teie nei ao, no te Etaretia ... ?

E teie te poroi na Ietu ia tatou : "Eiaha e tapitapi !" Mai te peu e, te parau nei Ietu ia tatou : "Eiaha e tapitapi !", te vai ra ïa te tumu e tano mau ai tatou ia parauhia i te omuaraa no teie matahiti apï e haamata nei e o ta te Fatu e hinaaro nei i te faahaamano ia tatou : "Na te Atua Metua i hamani i te rai o te fenua e te taata atoa".

Teie nei poroi aroha ia tatou i teie nei mahana matamua no Tenuare, te faahaamano nei ïa ia tatou tatai-tahi e, te mea faufaa roa'e i roto i te mau mea atoa i hamanihia e te Atua i roto i teie nei ao, e ere ïa te natura, te mahana, te avaë e te mau fetiã, e ere te tumu raau e te raau tupu, rau noa'tu ai to ratou huru e to ratou unaûna, e ere te animara o te aru, e ere te manu o te reva e te mau mea ora i raro i te moana. Te mea faufaa roa'e i roto i te mau mea atoa i hamanihia e te Atua, "te poe pârau" i roto i te mau ohipa atoa i rahuhia e te Fatu : o te taata ïa !

I roto i te parau tuatapapa no te hamaniraa o teie nei ao, aore anei te taata i riro ei ohipa tei puohu e tei faaoti i te mau mea atoa i hamanihia e te Atua ? oia. I te ono o te mahana, ua hamani te Atua i te taata ia au i to'na hohoà e i to'na huru, e te mau mea atoa i hamanihia'tu namua i te taata, i hamanihia ĩa no te taata. No te Atua, ua hau atu ĩa te faufaa o te taata i te mau mea atoa i hamanihia e te Atua. E mea faufaa atoa iho ā te mau mea atoa i hamanihia hou te taata, teie rā ua hau atu te faufaa o te taata i taua mau mea ra.

I te omuaraa no teie matahiti api, e na roto i teie nei poroi aroha, no te faahauraa i to tatou manao e i to tatou tiaturiraa, te faahio nei te Fatu i to tatou mau mata i niā i te mau manu o te reva tei hamanihia e ana e o tei hamani atoa hoi i te rai e te fenua. Na te Atua ratou e faaamu nei i te maa teie rā te imi nei ihoa ratou i te maa e au iairatou no te mau mahana taitai-tahi, aita rā ratou e haaputu nei i te maa. E ua ite te Atua e, taua mau manu ra o te reva, ia amu ĩa ratou i te maa e tia'i, e aita roa te hoē noa'e i roto ia ratou i moēhia Ia'na ! Teie rā, ua hau atu te taata i te faufaa i te mau manu o te reva. No reira Ietu i parau ai ia tatou : "Eiaha e tapitapi, eiaha e manaonao i te parau no ananahi, na ananahi iho e haapao atu ia ananahi".

A hio atoa na tatou i te tiare maohi e aore ĩa i te taina e te mau tiare atoa e vai nei : na te Atua atoa i hamani ia ratou, i faaau i to ratou huru e i to ratou atoa unaūna, e vairaa poto roa rā to ratou i niā i te fenua nei : i teie mahana, te itea mai ra to ratou unaūna rahi tei hau atu i te unaūna i te hanahana o te arii ra o Tōromona ; teie rā ananahi anaè, ua ore to ratou unaūna e e faaruehia'tu ra i muri aè. E te taata, te parau nei Ietu, ua hau atu ĩa to'na unaūna e to'na faufaa i te mau tiare atoa e vai nei : e te tapitapi nei ā ĩa tatou ma te parau e : eaha rā te huru o teie matahiti 1988 no'u, eaha rā ta'u e amu ; eaha rā ta'u e inu, eaha rā ta'u e ahu ... ? E inaha, ua ite aè na hoi to tatou Metua i te ao ra e, ia noaa iho ā taua mau mea ra ia tatou i teie matahiti api e tiā'i !

E riro paha tatou i te parau e, e tano te parau no te tapitapi-ore-raa no terā oraraa i roto i te ô i Etene hou te hararaa. Teie rā, i muri aè, ua ô mai te parau no te hara i roto i te ô i Etene e i roto i teie nei ao o tei faahuru e roa i te auraa maitai no te mau mea atoa i hamanihia e te Atua. No reira, te roohia nei te taata i te ati, te pohe nei te manu, te oriorio nei te tiare, te ino nei te faaapu i te vero, te roohia nei te tamarii e te taata paari i te ati mai e i te ati poia e te pohe nei ... Nahea ia tatou i te ore e "tapitapi" ? Nahea ?



E parau mau roa te reira e ua ô mai te hara i roto i teie nei ao, teie râ ua ô mai o ĩa na roto i te haapao-ore e i te auraro-ore o te taata i te hinaaro o te Atua, eiaha roa râ tatou e manao e ua faaruê te Atua i te ohipa o ta'na i hamani ! Aita. Te faaamû noa nei â râ o ĩa i te manu o te re-va, te faaahu noa nei â oia i te tiare maohi, i te taina e i te mau tiare a-toa o te aua, te faariro noa nei â Oĩa i te taata ei ohipa tumu no te mau mea atoâ i hamanihia e ana e ei manaonaoraa tumu na'na. E te tapao tei haapa-pû ia tatou i te parau mau no taua parau ra, o to'na ĩa tonoraa mai i ta'na Tamaiti fanau tahi i te ao nei i te mahana no Noera ra, no to'na here i te taata o ta'na i hamani ! E noa'tu taua horoâ na te Atua ra tei haapapû mai ia tatou i to te Atua haapao-tamau-maite-noa-raa ia tatou i terâ mahana e i terâ mahana, te tapitapi noa nei â tatou !

I te omuaraa o teie matahiti api 1988, i mua i ta tatou mau poroiraa aroha tei faaite mai i to tatou manaonao ia tatou e i te feia o ta tatou i here, teie te poroi aroha na Ietu ia tatou : "Eiaha e tapitapi !" E nahea ta-tou e ore ai e tapitapi ? Teie te pahonoraa a Ietu : "E imi outou i te Pati-reira o te ao e i te parautia a te Atua namua roa !" oia hoi, e namua na ou-tou i te manaonao i te parau no te hoê oraraa oaoa e riro ai te taatoa i rei-ra ei mau taeae e ei mau tuahine tei ora i te parau no te autaeaeraa, no te aroha e no te faaoreraa hara i roto i te hoê ao taaé roa tei haapao noa ia'na iho ... Teie te parau ta tatou e manaonao e e faaite.

Te Atua tei hamani i te rai e te fenua, e haamau atoa o ĩa i te hoê ao api ta te Pipiria e parau noa ra e : te Patireia o te Ao ; tei reira : te parautiâ, "aita e pohe te reira, aita e oto, aita e mihi, aita e mauuiui", aita atoâ tapitapiraa faahou i reira. I te reira mahana, e ite-faahou-hia'i te oraraa oaoa no te ô i Etene, eita tatou e tapitapi faahou i reira i te parau no te maa, no te inu, no te ahu no te mea e parahi tamau te Atua i rotopu ia tatou i reira e i pihai iho atoa ia tatou.

Ia riro teie nei Matahiti Api 1988, ei matahiti maimiraa na tatou i te Patireia o te Atua e i ta'na parautiâ, e te mau mea atoa e toe ra, mai te maa, te inu, te ahu, te oapa, te maitai, te hau ... e horoâ-noa-hia mai ĩa te reira e te Atua. No reira "eiaha tatou e tapitapi i te omuaraa no teie Matahiti Api 1988 !

Ia ora na i te haereâ !